

cun fecours humain: Je priay Dieu qui leur pardonnaft, mais ie ne fus pas exaucé, car ils ont fait depuis naufrage, & la diuine Majesté fe feruit de cet abandonnement des hommes, pour me conferuer la vie.

Me voyant donc tout seul, delaiissé en vne terre étrangere, car toute la flotte estoit desia bien loing; i'eü recours à la sainte Vierge, en l'honneur de laquelle nous auions fait vne neufuaine, qui nous a procuré de cette Mere de Misericorde, vne protection toute visible & iournaliere. Pendant que ie la priois, i'aperceu contre [20] toute esperance, quelques Canots, ou estoient trois de nos François: ie les apelay, & ayans repris nostre vieux Canot, nous nous mîmes à ramer de toutes nos forces pour attraper la flotte; Mais nous l'auions perdue de veüe depuis long-temps, & nous ne sçauions où aller, estant tres difficile de trouver vn petit détour qu'il faut prendre, pour se rendre au portage du Sault aux Chats (c'est ainsi qu'ils nomment cet endroit.) Nous estions perdus, si nous eussions manqué ce detroit; mais il pleut à Dieu par les intercessions de la sainte Vierge, nous conduire iustement, & presque sans y penser, à ce portage, où ayant aperceu encor deux Canots de Sauvages, ie me iettay à l'eau; & ie fus les deuancer par terre, à l'autre costé du portage, ou [21] ie trouuay six Canots. Quoy leur dis-je, est-ce ainsi que vous abandonnés les François? ne sçaués vous pas que ie tiens entre mes mains la voix d'Onnontio, & que ie dois parler de sa part, à toutes vos nations, par les presents dont il m'a chargé? Ces paroles les obligerent à nous aider, enforte que nous ioignîmes le gros de la flotte sur le Midy.

Estant débarqué, ie crû en cette extremité, deuoir